


ILMO. CONCELLO DE VIANA DO BOLO (OURENSE)

ASUNTO: Remitindo acordo Pleno de data 31 de maio de 2016

Por medio da presente achégase a certificación de referencia, relativa á aprobación da MOCIÓN de Declaración de Concello oposto aos Tratados de Libre Comercio (TTIP, CETA, EPA e TISA) promovida por esa Plataforma Cidadá, significándolle que, con esta mesma data foille remitida a tódolos organismos interesados ó efecto.

Viana do Bolo a 8 de xuño de 2016

O Alcalde



Secundino Fernández Fernández

D. Angel Dorrío
Representante Plataforma Cidadá de Ourense Non ao TTIP
Rúa Bedoya, 5 -2º D
32004 Ourense



ILMO. CONCELLO DE VIANA DO BOLO (OURENSE)

M^a ASUNCIÓN ÁVILA GARCÍA, SECRETARIA INTERVENTORA ACCIDENTAL DO CONCELLO DE VIANA DO BOLO

CERTIFICO

Que, o Pleno do Concello de Viana do Bolo, en sesión extraordinaria celebrada o día 31 de maio de 2016, adoptou, entre outros, o seguinte acordo que, sendo o seu tenor literal e a reserva dos termos que resulten da aprobación da acta correspondente, o que a continuación se indica:

I.- MOCIÓN PRESENTADA POLA PLATAFORMA CIDADÁ DE OURENSE “NON AO TTIP” :-

O Sr. Alcalde procede a dar lección da mesma

“Ao abeiro do artigo 91.4 e 97.3 do RD 2568/1986, polo que se aproba o Regulamento de Organización, Funcionamento e Réxime Xurídico das Entidades Locais, presenta o Plenario do concello a seguinte **MOCIÓN de Declaración de Concello oposto aos Tratados de Libre Comercio**.

Moción presentada para que o Concello de Viana do Bolo declare a súa oposición aos Tratados de Libre Comercio (TTIP, CETA, EPA e TISA) que na actualidade se negocian por parte da Comisión Europea, así como a todos os mecanismos de arbitraxe e cooperación reguladora que nestes e noutras tratados se impoñen en detrimento da democracia, o ben común e os dereitos e liberdades das persoas e os pobos.

EXPOSICIÓN DE MOTIVOS:

Por parte da Comisión Europea negócianse na actualidade, con outros países, unha serie de Tratados de Libre Comercio (TLC) nos que, baixo a desculpa de facilitar o comercio e os investimentos entre países, establecense as bases para a privatización definitiva dos bens comúns e os servizos públicos, a subtracción da soberanía popular, o sometemento de institucións e marcos lexislativos e, en definitiva, a submisión dos dereitos e liberdades fundamentais aos intereses particulares das grandes empresas transnacionais.

Os principais acordos en fase de negociación dos que se teñen noticias son o Tratado Transatlántico para o Comercio e o Investimento (TTIP), que se negocia con Estados Unidos; o Acordo Económico e Comercial Global (CETA) con Canadá; os Acordos de Asociación Económica (EPA) con países de África; e o Acordo sobre Comercio de Servizos (TISA), que implica á Unión Europea, Estados Unidos e outros 22 países.

As negociacións destes tratados estanse celebrando a porta pechada, de maneira opaca, cunha intolerable ausencia de transparencia e control democrático por parte da ciudadanía e dos seus representantes políticos (parlamentos nacionais e europeo), pero cunha ampla presenza de *lobbies* das empresas trasnacionais.



ILMO. CONCELLO DE VIANA DO BOLO (OURENSE)

Máis alá dun acordo comercial o TTIP e o CETA pretenden harmonizar as leis de Estados Unidos e Canadá cos da Unión Europea, de xeito que as diferentes normativas sobre protección social, laboral ou ambiental non sexan un obstáculo ao libre mercado. Así, nun futuro próximo ímonos atopar cun mercado laboral desregulado; coa anulación do "principio de precaución" que poría en perigo a nosa saúde e seguridade; co reforzo das patentes e o monopolio sobre medicamentos que encarecería prezos; coa imposibilidade de protexer os produtos locais e a desaparición das denominacións de orixe; coa competencia desleal das grandes granxas americanas aos nosos pequenos produtores agropecuarios; coa redución fiscal ás grandes empresas e fortunas; ou coa desaparición de milleiros de postos de traballo e de pequenas e medianas empresas, entre outras consecuencias derivadas destes tratados.

Propónse a creación do Consello de Cooperación Regulatoria, que supervisará tódalas regulamentacións e actos normativos da UE e dos seus Estados membros, incluídos os gobernos a nivel central e local, en relación ao estipulado en calquera dos capítulos destes tratados. Neste ente permanente participan ademais dos representantes gobernamentais os propios *lobbies* das empresas transnacionais, que terán a potestade de esixir cambios nas lexislacións actuais, así como de vetar futuras normativas se consideran que as mesmas lesionan os seus investimentos. Isto é, crear un organismo con participación de compañías privadas que decide que leis poden, ou non, ser debatidas e aprobadas polos parlamentos e gobernos electos democraticamente polos cidadáns.

Estes acordos supoñen así mesmo a creación dun marco pseudo-xurídico das relacións estado-empresas: sendo os tribunais arbitrais do Dereito Corporativo Global, alleos aos principios básicos do estado de dereito, os que rexan as relacións entre institucións públicas e empresas transnacionais. No caso de que os investidores estranxeiros presentaren conflitos cos Estados, un tribunal especial de arbitraxe encargárase de resolver de acordo coa cláusula de 'Resolución de conflictos Investidor-Estado' (ISDS en inglés), ou ben polo máis novo Sistema de Tribunal de Investimentos (ICS). Este tribunal tería competencias para impor compensacións económicas aos Estados en beneficio dos investidores estranxeiros, se estes demostraran que as normas adoptadas polos gobernos afectan os seus beneficios presentes ou futuros. Así, medidas como a subida do Salario Mínimo Interprofesional, o incremento dos impostos ás grandes corporacións ou o aumento das esixencias ambientais ás empresas contaminantes poderían supor sancións financeiras multimillonarias ás arcas públicas.

En relación ao acordo cos países africanos (EPA), o seu obxectivo é suprimir o 75% dos dereitos de aduana sobre as importacións procedentes da UE nos países africanos. Isto resultará especialmente prejudicial para os países africanos, por abrir as súas portas á competencia desleal das grandes empresas europeas. Pero en segunda instancia tamén prejudica á poboación europea, dado que favorece un modelo de agricultura produtiva, contaminante e pouco intensiva en empregos, que será competencia directa para o noso sector agrario, ademais de repercutir sobre unha migración masiva de poboación africana cara a Europa pola ruína das súas economías.

Pola súa banda o TISA ten como obxectivo a privatización dos servizos públicos, abrindoos á competencia internacional, e previr calquera intervención pública. Prohibese expresamente a xestión pública ou o cambio de regulación de servizos que algunha vez fosen xestionados de maneira privada. O que supón a imposibilidade da remunicipalización ou calquera forma de recuperación de servizos



ILMO. CONCELLO DE VIANA DO BOLO (OURENSE)

privatizados, áínda naqueles casos en que se demostre que a xestión privada non garanta uns niveis básicos de calidade, cobertura e sustentabilidade. Entre os servizos obxecto de liberalización están incluídos a educación, a sanidade, a seguridade social, a xestión da auga, a xustiza, ou a seguridade (policia e exército). A partir da sinatura do tratado, a potestade do Estado e das Administracións Públicas para dar estes servizos estará supeditada ás normas da competencia, polo cal pode ser un importante paso para o desmantelamento do Estado Social e de Dereito tal e como o coñecemos.

Este espíritu liberizador inclúe tamén as compras e licitacións de bens e servizos das Administracións Públicas, o que compromete a facultade dos representantes elixidos para administrar libremente as súas comunidades locais e promover a actividade industrial, o emprego e as iniciativas locais. O tempo que supón un paso atrás na lei de contratación pública da Unión Europea na que ademais dos criterios económicos admítense outros como os sociais ou os ambientais.

Este tratado asínase con países que non cumpren os convenios da OIT, polo que expoñemos ás nosas empresas á competencia doutras que son máis competitivas porque explotan máis aos seus traballadores, o que levará ao peche de pequenas e medianas empresas e á posterior deterioración dos nosos dereitos laborais para gañar en competitividade.

Os tratados aquí mencionados recollen cláusulas de blíndaxe, de tal xeito que só poderán ser emendados ou anulados co consentimento unánime de todos os asinantes, o que supón na práctica o sometemento de calquer futuro goberno ao aquí pactado.

Estes mecanismos supoñen un ataque frontal á soberanía dos pobos, limitando a capacidade das Administracións Públicas de calquier nivel (estatal, autonómico ou municipal) para adoptar políticas encamiñadas a cubrir as necesidades dos cidadáns e a defender os seus dereitos e liberdades, e implican supeditar as institucións e marcos legais aos intereses particulares das grandes empresas multinacionais.

Baixo o pretexto de facilitar os intercambios económicos e de investimentos entre países, trátase de impor un novo modelo de gobernanza que porá a soberanía, os dereitos e liberdades, a seguridade, a saúde pública, os bens comúns, os servizos públicos, a protección das economías locais, as pequenas e medianas empresas e os traballadores en mans das grandes corporacións.

XUSTIFICACIÓN:

- A cidadanía no seu conxunto, así como os seus gobernos (estatais, autonómicos e locais), teñen o dereito de ser informados e consultados sobre a lexislación acordada a escala europea e que lles afecta de xeito directo. Ese dereito está a ser vulnerado de maneira flagrante, a respecto das negociacións que se veñen producindo arredor do TTIP, o TISA e outros tratados de libre comercio.
- O comercio e o investimento soamente poden contribuír ao ben común baseados en criterios de xustiza social, económica e ecolóxica, criterios que non están a ser aplicados no desenvolvemento destes tratados



ILMO. CONCELLO DE VIANA DO BOLO (OURENSE)

- A privatización dos servizos públicos proposta por estes tratados restrinxe a súa universalidade e accesibilidade, aumenta o seu custo e reduce a súa calidade, polo que a súa xestión debe ser pública, artellando mecanismos de control social.
- Os dereitos humanos e os dereitos sociais son dereitos inalienables, polo que non poden depender da lóxica do mercado.
- As institucións públicas e os marcos legais débense á defensa dos dereitos e liberdades das persoas e os pobos, o ben común e o interese xeral, por enriba de calquier consideración relativa ao libre mercado ou aos intereses particulares das empresas transnacionais.
- As Corporacións Locais son as canles más axeitadas para promover os servizos públicos e o fomento da economía, da industria e do emprego local. Sendo os Concellos as institucións democráticas más próximas á ciudadanía teñen un papel prioritario na defensa dos dereitos sociais, económicos e ambientais das veciñas e veciños, polo que teñen o deber de inxerencia respecto ao que persegue o TTIP, o TISA e os outros tratados de libre comercio.

En base ao anteriormente exposto, Son de Trives a través do seu concelleiro no grupo mixto insta a adopción dos seguintes

ACORDOS:

1] Declarar ao Concello de Viana do Bolo como municipio oposto ao TTIP, TISA, CETA, EPA e aos Tratados de Libre Comercio que negocia na actualidade a Comisión Europea, así como a todos os mecanismos de arbitraxe e cooperación regulatoria que nestes e noutros tratados se imponen en detrimento da democracia, o ben común e os dereitos e liberdades das persoas e os pobos.

2] Solicitar ao Goberno de España, así como aos grupos parlamentarios do Congreso dos Deputados e do Parlamento Europeo, o seguinte:

- Que se opoñan á aprobación do TTIP, o CETA, o EPA e o TISA, e de todos aqueles Tratados de Libre Comercio que contraveñan os principios de xustiza social, económica e ecolóxica, que non sexan desenvolvidos de maneira pública e transparente, e que vaian en detrimento da democracia, a soberanía popular, o ben común e o interese xeral.
- Que velen porque os mecanismos de arbitraxe e resolución de conflitos entre investidores e estados (disposicións do tipo ISDS ou ICS) non sexan incluídas en ningún futuro tratado de comercio ou investimentos, e que desaparezan dos tratados existentes.
- Que se opoñan á participación directa ou indirecta das Empresas Transnacionais, a través de calquier tipo de organismo ou lobbies, nos procesos reguladores ou normativos da UE e os seus Estados Membros, en relación con temas sociais, laborais, sanitarios, medioambientais ou calquera outra materia que afecte ao interese xeral. Os entes reguladores públicos poderán en todo caso establecer consultas non discriminatorias con organizacións democráticas da sociedade civil.



ILMO. CONCELLO DE VIANA DO BOLO (OURENSE)

- Que velen porque os acordos comerciais sigan estritamente criterios de transparencia, participación cidadá, solidariedade, democracia e soberanía, para promover prácticas que sexan xustas e que sirvan ao interese xeral das persoas e dos pobos e respecten e favorezan o desenvolvemento dos seus dereitos e liberdades.

3) Dar traslado deste acordo aos Gobernos de España e de Galicia e a todos os grupos parlamentarios do Congreso dos Deputados, do Parlamento Galego e do Parlamento Europeo, para que se rexistre e quede constancia do mesmo.

Dado que non existen intervencións o Sr Alcalde somete a votación a súa aprobación, nos termos en que foi formulada, quedando aprobada pola maioría dos concelleiros presentes e coa abstención dos concelleiros do Partido Popular, D. Serafín Sierra Bembibre e Dª Ramona García Méndez.

E para que así conste e surta os efectos oportunos expido o presente certificado co Visto e Prace do Sr. Alcalde, en Viana do Bolo a 8 de xuño de 2016.



Addo.: Secundino Fernández Fernández

